

朔方備乘

朔方備乘卷第二十七

考二十一

北徼水道考敘

大拉該海所受水

甘查甲海所受水

郭爾噶海所受水

冰海所受水

烏格里達海灣所受水

阿比海灣所受水

衛噶特海所受水

白海所受水

波羅的海所受水

黑海所受水

裏海所受水

伊策三布拉島中諸水

諸湖

臣秋濤謹案九州水道詳於禹貢自後班固桑  
欽酈元之徒各有著述歷代史冊地志於川瀆

分合亦多紀載然皆詳中原而略邊徼詳於東  
海南海所受之水而於北海西海所受之水則  
闕焉莫考今俄羅斯境內水道往牒罕徵職是  
故也臣秋濤謹詳稽中外圖籍訂證異同經流  
支派罔弗臚列用補羣書之闕略至中國發源  
之水流入俄羅斯界者派別雖多大概不外三  
大支其在肯特山以東水入彼界復歸中國而  
入東海者東一支也皆匯於黑龍江別詳良維  
諸水考其在杭愛山以北水入彼界直達北海

者中一支也皆匯於色楞格河別詳色楞格河源流考其在金山以北水入彼界直達北海者西一支也皆匯於額爾齊斯河別詳額爾齊斯河源流考是三大支均非俄羅斯境所得攝也故析其部居不相雜厠惟源委均在俄羅斯境者始以北徼水道目之謹發其凡於此云

大拉該海所受水

大拉該海東北方之渤海也亦曰小海

臣秋濤謹案吉林之東襟大海自混同江口

以北海水漸迤西北至索倫河口皆爲中國境又北得戾拉河口又北得烏底河口爲甌脫地又西北得阿老河口始爲俄羅斯境西人地理書謂之大拉該海卽唐書黑水靺鞨北境之小海也

迤而西北逾烏底河口襟俄羅斯東境阿老河入之

臣秋濤謹案阿老河源出外興安嶺東入海其西隔山卽中國噶穆河源也

又北鄂斯都爾納薩河入之又北烏底雅河入之  
又西北烏拉克河入之又西北鄂和達河入之  
又西北碩羅克瑪河入之

臣秋濤謹案碩羅克瑪河二源並發南流而合東入海

又西北一水入之又西北達溫河入之又西北拉瑪河入之

臣秋濤謹案拉瑪河出外興安嶺北其南隔山卽精奇尼色禽也拉瑪河曲曲東流約六

百餘里入海

又西北鄂拉河入之又西北納勒春河入之又轉而北達達哈河入之

臣秋濤謹案達達哈河源出金阿林東窩集  
中東流五百里入海大拉該海至此轉而北  
迤

又北衛底阿河入之

臣秋濤謹案衛底阿河自西北發源東南流  
入海



又迤而東登屯河入之

臣秋濤謹案登屯河自北山發源南流入海  
大拉該海至此轉而東迤

又東巴倫河入之又迤而東南奔什納河入之

臣秋濤謹案奔什納河發源金阿林東麓流  
數十里瀦爲巨泊復從泊東北流出曰奔什

納河又東北流五百餘里曰伊斯奢爾納河  
又東受北來一水折東南流受東來一水又  
南流索羅烏達納雅河自東來入之又南阿

噶隆河自西來入之又南郭斯米納河自東來入之又東南流有一水自東北山發源流五百餘里來會又折西流入海大拉該海至此轉而東南迤

又東南達魯噶河入之

臣秋濤謹案達魯噶河自東北大山發源二水南流而合又西流二百餘里入海

又東南吉斯岡噶河入之又東南巴特沙底瑪納雅河入之又東南勒佛那雅河入之又東南

有五小水入之又東南烏哈魯薩瓦河入之又  
東南有一水入之又東南納努河入之又東南  
克羅多和羅瓦河入之又東南吉爾巴科瓦河  
入之又東南倭羅富斯噶雅河入之又東南有  
一水自東北來入之

臣秋濤謹案此水兩源並出北山其山之北  
卽噶穆薩特喀城也二源合南流折西南流  
入海

又東南有二水入之

臣秋濤謹案大拉該海至此轉而東迤三百餘里又轉而北迤爲甘查甲海

甘查甲海所受水

甘查甲海自南迤而北有一水自西來入之又迤而北而西北噶穆薩特喀水入之

臣秋濤謹案噶穆薩特喀水發源噶穆薩特喀城南山中西流受北來一水又西北流受西南來二水折東北流受西來二水又東北入海

又迤而西而西南有一水自東來入之又迤而  
北而西而南而東南復迤而西而西北而西南  
又迤而北而東北而西又迤而北額瑪納拉河  
入之

臣 秋濤謹案額瑪納拉河源出西山東麓隔  
山卽勒佛那雅河源也東流入海

又迤而西而北而東有一水自西北來入之又  
東一小水自北來入之又東瑠都爾噶河入之  
臣 秋濤謹案瑠都爾噶河源出西北大山中

又迤而東而北有一水自西北來入之又迤而東南而東而北而西北阿布噶河入之又西北噶底爾噶河入之

郭爾噶海亦東北方之渤海也自東迤而西而  
北阿納底爾河合諸水自西來入之

臣秋濤謹案阿納底爾河一作阿那底河源出郭爾噶東北山中二源並發北流而合西流逕兩山間千餘里折南流惹博羅訥雅河自西來入之又南流額拉博爾河自西南來入之折東南流五百餘里滿河合諸水自西南來會滿河源出大拉該海之北山中三源並發北流而合曰滿河又北流鄂爾羅巴河合一水自西來入之折而東流又北流噶拉薩納雅河自東來入之又北流與阿納底爾

河會二水既合折東流有一水出西北山東  
南流四百餘里來會折東南流鄂納們河發  
源西南山中流百餘里自南來入之又東流  
入海此水源流二千餘里納有名之水凡六  
亦巨川也總記言阿爾台山所出之水惟阿  
那底河趨東海卽指此水

又迤而東尼哲爾河入之又東珠郭噶河入之

臣秋濤謹案尼哲爾河珠郭噶河皆出郭爾

噶境北山南流入海海自此迤而東而北而



東北而東南有海峽廣僅五十餘里卽墨領  
峽一名白令峽者也渡海峽卽北亞墨利加  
洲境矣自海峽迤而西北千餘里爲冰海

冰海所受水

冰海自東南迤西北阿納巴拉河入之

臣秋濤謹案阿納巴拉河源出金阿林東麓  
在博特錫倭爾斯歸城南窩集中緒爲一泊  
周數十里東流四百餘里入海總記有阿那  
斯加河又作阿臘斯加河卽此水也

又迤而北襟諾斯哈達大山之東又迤而西襟  
山北又迤而西南襟金阿林北又迤而西南襟  
博特錫倭爾斯歸城之北之西郭列穆瑪河合  
諸水自西南來入之

臣秋濤謹案郭列穆瑪河一作珂里馬河俄

羅斯東北境巨川也源出惹爾莽阿城東南

山中北流七百餘里有一水自西南來會

臣秋

濤謹案此水源出惹爾莽阿城西

又東流逕

北山中即郭列穆瑪河西源也

作租城南境

臣秋濤謹案距城約二百里

安巴鄂壘河自

東南來會

臣秋濤謹案安巴鄂壘河出金阿林西麓西流三百里有額勒瑪噶

雅河合鄂謨倫河自東南來會折北流有阿集格鄂壘河自東來會又西北流三百餘里

入郭列穆瑪河

又東北流有一水自東南來入之又

東北流伯勒蘇格河自東南來入之

臣秋濤謹案伯

勒蘇格河源出金阿林西麓西流五百餘里來會

又東北岐爲二水

繞郭列穆斯歸城四面至城東北復合又東

北流逕德爾吉郭列穆斯歸城之西復繞其

北又東北流入海

又迤而西袞古瓦河入之

臣秋濤謹案袞古瓦河在郭列穆斯歸城西作租城東距二城各百餘里發源窩集中岐爲二水皆北流百餘里復合又北流三百里入海

又西伊斯勒郭特斯都克河入之

臣秋濤謹案伊斯勒郭特斯都克河源出作租城北窩集中北流五百里入海

又西阿拉薩納河入之

臣秋濤謹案阿拉薩納河源出作租城西境

山中距城約二百里北流五百餘里入海

又西音底日爾噶河入之

臣秋濤謹案音底日爾噶河有二源皆出作  
租城西南境大山中北流五百里而合又西  
北流三百里入海總記有因底牙加河北流  
入冰海卽此

又西有一水自東南來入之

臣秋濤謹案此水源出惹爾莽阿城西北境  
大山中曲曲西北流千餘里入海

又西有一水自南來入之

臣秋濤謹案此水源出邁歸城東北境山中曲曲西北流八百餘里又北流入海

又西列訥江合眾水自南來入之

臣秋濤謹案列訥江爲俄羅斯東境大川自色楞格額爾齊斯以外匯合之多源委之遠推此水爲最一作列訥河一作勒拏河一作裏那河一作朱爾克河源出柏海爾湖之北大山北麓曰列訥色欽北流百餘里逕格勒

噶珊東又東北流合南來一水又北流合西  
來一水又東北流合東南來二水又北流倭  
爾郭任斯歸城水自西南來入之又北流合  
東南來一小水又北流必魯爾集河自西南  
來入之又北流集林噶河自東南來入之又  
北流逕鄂爾佛拉特噶珊東折西流繞其北  
穆噶河自西南來會臣秋濤謹案穆噶河源  
出西南山中北流合一  
水又東北合古達河又合南又北流有一水  
來一水又東北入列訥河  
自東南來入之水勢始盛曰列訥烏拉烏拉

者譯言江也俄羅斯境水以江名者惟列訥  
而已列訥江又北流麤存河自西來入之又  
北流巴多瑪徐噶雅河自東南來入之又北  
流逕米德里斯克噶珊東巴多瑪布爾察雅  
河自東南來入之又北流郭瓦倭河自西來

入之又北流衛底穆河自東南來會

臣秋濤  
謹案衛

底穆河源出外興安嶺西北麓曰衛底穆色  
欽北流五百餘里折西流百餘里合郭拉河  
郭拉河源出巴爾古錫穆城東境大山緒爲  
一泊周數十里北流六百里與衛底穆河合  
又西北流一千二百餘里至列訥城西南入  
列訥江異域錄云有一費提穆河自根特汗



山之陰流出由巴爾古西穆城之東繞過昂  
噶拉河源歸入朱爾克河卽此衛底穆河也  
此水源流長一  
千七百餘里 又北流錫費雅河自西來入

之又北流諾雅河自西來入之又北流烏勒

克瑪河自東南來會

臣秋濤謹案烏勒克瑪河上源曰都日爾河出

外興安嶺北千餘里外窩集中渚爲巨泊西  
流合南來一小水又西北流有三水合流自  
南來會又西北逕冬古爾斯歸城南繞其西  
又西北流始曰烏勒克瑪河又西北流入列  
訥江此水源流  
長九百餘里 又北流逕惹鞠斯歸城東又

東北流希濃河自東南來會

臣秋濤謹案希濃河源在都日

爾河源之東北數十里窩集中西北流南合  
一小水北合佛倫河又曲曲西北流五百里

經巴達爾斯歸城西南又西北流三百餘里  
至邁歸城西南瑪雅河自邁納甘湖發源合  
一水西北流入列訥江此水源流長千餘里又西  
二百里有水自東南來入之又北流瓦拉喀  
河自西南來會臣秋濤謹案瓦拉喀河源出  
西南窩集中曲曲東北流五  
百餘里合西來之衛推河又  
東北流三百餘里入列訥江又北流三百餘  
里入海自發源至此約三千二百餘里

又迤而西有一水入之

臣秋濤謹案此水發源山中北流五百里入  
海其海口東距列訥江口約二百里

又迤而西有一水入之

臣秋濤謹案此水發源山中北流曲曲五百餘里入海其水源處西隔山有一水卽西流入必雅錫達河者

又迤而西必雅錫達河入之

臣秋濤謹案必雅錫達河源出希穆斯歸城

西北五百里外窩集中東北流二百里瀦爲

巨湖曰鄂斯羅惹錫湖

臣秋濤謹案有一小水自湖東南流入不

知其復自湖之正北流出東北流百餘里有

一水自東南大泊中西北流來會又東北流  
曰必雅建達河又曲曲東北流六百餘里有  
一水自西來會臣秋濤謹案此水出西南山  
合一水又東北流來匯源流  
長六百餘里又東流一百餘里有一水自東南來  
入之又北流二百餘里入海

又西有二水合流自南來入之又迤而西北而  
北而西而南而復西有四水合流自南來入之  
又西噶道噶河入之

臣秋濤謹案噶道噶河長二百餘里北海細

流也

又西有三水合流自南來入之又西南郭斯里噶河合眾水自南來入之

臣秋濤謹案郭斯里噶河源出窩集中在鄂

斯羅惹錫湖之西北隔山相望其水西北流

四百餘里有一水自南發源合四水又合律

錫誥湖水來會

臣秋濤謹案律錫誥湖水乃額塞湖水東北分流互詳後

達拉伊達河篇內

又北流曰噶稻噶河又北流有一

水自西南來納南一水來會又北流入海海

水自此迤而西北而北而西而南爲烏格里達海灣

烏格里達海灣所受水

烏格里達海灣卽小海也自北迤而南而東南達拉伊達河入之

臣秋濤謹案達拉伊達河源出東南窩集中西北流鍾爲巨浸曰額塞湖南北袤二百餘里東西廣百餘里達拉伊達河匯其東南有一水匯其正西復從湖北面溢出分爲二其

一支東北流瀦爲律錫誥湖下流合郭斯里  
噶河入冰海其一支西北流曰達拉伊達河  
曲曲流六百餘里北入烏格里達海灣烏格  
里達海灣乃商船所聚自烏格里達浮海而  
北有大島名伊策三布拉島唐書謂骨利幹  
北有小海冰堅八月可渡者卽指此海而言  
也

又迤而西惹尼色河合衆水來入之

臣秋濤謹案惹尼色河卽色楞格河也詳色

楞格河源流考海自此迤而北而西千餘里  
復迤而南而東爲阿比海灣

阿比海灣所受水

阿比海灣正北方之渤海也自北迤而南而東  
八百餘里鄂索圖魯克河入之

臣秋濤謹案鄂索圖魯克河自東南發源西  
北流折西流入海源流長百餘里

又迤而東南達斯河入之

臣秋濤謹案達斯河源出窩集中緒爲巨泊



自泊中流出曰達斯河北流二百餘里逕薩達里莽阿斯城東又西北流入海

又迤而西索博爾底納河入之又西布爾湖東支水入之又西納定河入之又西布爾湖西支水入之

臣秋濤謹案布爾湖在薩達里莽阿斯城西南四百里外窩集中南北袤二百里東西廣二百餘里湖中水分爲三支東支自湖正北流出行六百餘里入海中支曰納定河自湖

西北流出行七百餘里入海西支自湖西稍  
北流出行七百餘里合南來一小水入海  
又迤而西南襟惹薩克吉城西北額爾齊斯河  
合眾水自南來入之

臣秋濤謹案額爾齊斯河亦名阿比河亦名  
烏彌河故其入海處曰阿比灣亦稱烏彌河  
口詳見額爾齊斯河源流考

又迤而西襟阿布定噶珊北索布色噶惹水自  
南來入之

臣秋濤謹案索布色噶惹水源出索布色噶惹城西南山中東北流三百餘里南北各納一水又北流逕索布色噶惹城西又東流繞其北又東至阿布定噶珊之北入海海至此迤而北而西爲衛噶特海

衛噶特海所受水

衛噶特海自東迤西有一水自南來入之

臣秋濤謹案此水入海處海中有島周數百里名衛噶特島

又西迤而南有一水自東來入之

臣秋濤謹案此水入海處海中有島名色達登島

又南郭郭達瓦河入之又迤而西南而西而北復迤而西伯特蘇拉河入之

臣秋濤謹案伯特蘇拉河上源曰博綽爾湖在托波兒城西北七百里外窩集中南北袤二百里東西廣一百餘里湖水從湖之西面流出曰博綽爾河地理全志謂之北酌拉河

其水西北流三百餘里巴必努郭羅特水自

東北來入之

臣秋濤謹案巴必努郭羅特水出巴必努郭羅特城東南窩集

中瀦爲大泊復從泊中流出西流逕巴必努郭羅特城南又西流有二水自城東北合流來會又西流三百餘里入博綽爾河又北流魯克達河自西南

來入之

臣秋濤謹案魯克達河自伊斯瑪城西北大山北麓二源並發行百餘里

合流東北至伯色爾斯歸城東南入博綽爾河

又北流緒爲布斯堆

湖南北袤二百餘里東西廣二百餘里復從

湖之北面溢出曰伯特蘇拉河北流逕布斯

堆羅色爾歸城西又北流四百餘里入海

又迤而北而西而南而復西郭爾郭瓦河入之  
臣秋濤謹案郭爾郭瓦河源出大山北麓在  
改郭羅多城東北五百餘里又北流四百餘  
里入海其入海處西北海中有多爾格島  
又迤而西北有一水自南來入之

臣秋濤謹案此水出大山北麓其南麓水卽  
南流入衛色克達河者海至此迤而西而北  
而東北復迤而西而西南又迤而西五百餘  
里爲白海

白海所受水

白海俄羅斯正北境之渤海也自東迤而西襟墨三城之北曰美森灣美森河入之

臣秋濤謹案美森河一作米森河源出東南窩集中西北流入白海墨三城卽以水得名也

又西襟必納噶城北又西襟阿爾甘惹爾城北曰亞干日灣都伊納河入之又西都伊納河支津入之

臣秋濤謹案阿爾甘惹爾一作亞爾干日爾

臣秋濤謹案干一作亞干日都伊納河一作  
或作干誤也

都納河一作盧威那河一作土味拏河一作

土未那河源出羅瑪諾傳城西南窩集中東

流折東北流逕倭羅克達城西有一水自西

北來入之

臣秋濤謹案此水出羅瑪諾傳城西北首受泊水東流有二水自北

發源合流入之又南入都伊納河

又東流繞其城北又東北

流曰蘇吉納河有一水自東南來入之又北

流逕索魯歪特集岳克達城又西北流衛色



克達河自東來入之

臣秋濤謹案衛色克達河發源布斯堆湖之西

大山西麓西流合北來一水又西流百餘里有一水自北山合東來二水南流來會又西流六百餘里至索魯至特集又西北流合西岳克達城西北入都伊納河

南來一水又西北流合西來一水又折西流

逕郭爾謨郭羅特城北其北卽必噶納城也

又西流逕阿爾甘惹爾城南繞至城西分爲

二支其北支北流入海其西支西流二百餘

里折北流入海

又西阿尼加河自南來入之

臣秋濤謹案阿尼加河源出阿占牙爾城南窩集中瀦爲大泊自東面流出折北流復折而東而北而西又北流入海

又西曰阿尼牙灣阿尼牙湖支津入之

臣秋濤謹案阿尼牙湖內府圖作額納噶鄂謨在俄羅斯西北境周千餘里中有大山數處卽古寬田吉思海也其湖東西南三面各有小水入之支津東北流入白海白海又迤而北而東而西北接西北冰海爲瑞典國界

非俄羅斯轄故從略焉

波羅的海所受水

波羅的海亦曰黃海在俄羅斯國新都彼得堡之西乃西北方之渤海也

臣秋濤謹案歐羅巴一土在亞細亞極西北隅中國之所謂大西洋也絕長補短約得亞細亞四分之一西距大西洋海海水由西北灣環注入大地曰波羅的海一作入得海一作黃海一作洲中海一作斯多各海一作波

得尼亞海轉注東北分兩汊約三四千里波羅的海之西岸與大西洋海相表裏地形如葵扇下垂曰瑞國從南岸突出如臂亘波羅的海之門閼與瑞國作凹凸之勢曰噠國噠國之南東北距波羅的海南岸西北距大西洋海一隅曰日耳曼列國日耳曼之東北臨波羅的海南岸曰普魯士國普魯士之東北臨波羅的海東岸曰俄羅斯國其國新都曰彼得堡在波羅的海東岸康熙中國王始疏

通波羅的海道水陸皆操形勢羅刹與泰西  
諸國角逐海上自此始也

其海有三灣在西北者曰波的尼灣瓦朐湖水  
入焉

臣秋濤謹案波的尼灣西岸爲瑞典國界東  
岸曰芬蘭爲俄羅斯國所屬地瓦朐湖水發  
源東南山中瀦爲湖又西北流入波得尼灣  
在東北者曰芬蘭灣

臣秋濤謹案芬蘭灣北岸爲芬蘭境東岸爲

彼得堡所治南岸爲彼得堡所屬地

集捫河入其北

臣秋濤謹案集捫河源出衛布爾城西北三百里外瀦爲大泊水從泊西南流出納北來二水又西南流分爲兩支皆南入芬蘭灣

訥瓦河入其東

臣秋濤謹案訥瓦河一曰尼瓦河一曰內襪

河首受刺多牙湖水

臣秋濤謹案此湖南北袤七百餘里東西廣四

百餘里湖之西南隅有洲洲上有城曰色布留斯博布魯克城

西流分爲二

支繞彼得堡城四面又西流入芬蘭灣

在東南者曰利牙灣土味拏河入焉

臣秋濤謹案利牙灣一曰利加灣東岸接斯多尼亞部西南岸接里窩尼亞部此灣爲俄羅斯內港大埠頭每年出入商艘千餘土味拏河與入白海之水名同地異

又納博斯布湖水

臣秋濤謹案博斯布湖水源出布郭傳噶珊東北四百里外窩集中西流折東北流三百

餘里有一水自東南發源流逕博勒斯古城  
西來會又西北流緒爲博斯布湖復自湖北  
面流出北流又波羅的海又湖之正西有支  
津一西流至多爾斯布爾噶珊南緒爲大泊  
復自泊之西面流出至博爾訥城之北入波  
羅的海

又納維士都拉河

臣秋濤謹案維士都拉河源出俄羅斯所屬  
之波蘭部西流經洼肖地之北折北流達普



魯士國界又北流入波羅的海海自此迤而西非俄羅斯屬地不具錄

黑海所受水

黑海者地中海之分支乃正西方之渤海也

臣秋濤謹案波羅的海之南海水由正西注入大地曰地中海泰西名墨力特爾勒尼安一作美的德拉虐由西而東約七千餘里再分小汊溢東北成巨浸曰黑海泰西名勒必西內府圖名薩哈連墨德里南懷仁圖謂之

秦海周迴約六七千里

臣秋濤謹案瀛環志略以爲周二三千里

誤也南北袤一千三四百里至千餘里不等東

西廣一千七百餘里地形如蟹南則大腹蟠

然北則兩螯竦峙端河涅博爾河皆北面巨

川各入一螯兩螯中間有微地再南有地如

蓮葉突入黑海曰哥里米海隅中有二城曰

博羅歸曰喀法皆俄羅斯屬也黑海之西之

南皆屬土耳其國西面所納之川惟多惱河

最大而遠然不隸俄羅斯境今不具錄黑海

東面舊亦屬土耳其自康熙以來俄羅斯侵據其地高加索諾尼阿諸部咸爲所有由是白黑海以東直抵裏海曩爲回教屬城今爲羅刹別部矣按泰西人有五大洲之說以黑海爲歐羅巴南界漢書言呼衍王展轉蒲類秦海之間秦海蓋卽黑海魏收言大秦海亦渤海也而與中國之渤海東西相望卽指此海魏源以地中海當秦海則相距太遠非呼衍兵力所能至矣唐時突厥可薩部落當黑

海之北元人滅阿速卽今黑海東北隅之地  
蓋自古北方強盛之時拓境必至黑海無可  
疑也三國志裴松之注引魏略曰大秦國在  
安息條支西大海之西從安息界安谷城乘  
船直截海西遇風利二月到風遲或一歲無  
風或三歲其國在海西故俗謂之海西有河  
出其國西又有大海海西有遲散城此言由  
安息水路往大秦必浮海也又曰從安谷城  
陸道直北行之海北復直西行之海西復直

南行周迴繞海乃到其國此言由安息陸路  
達大秦周迴繞海也按安息卽今波斯國正  
在黑海東南此路當是由波斯直北行沿黑  
海東岸之諾尼阿阿索富等處抵黑海北之  
擣里達等部又直西行抵黑海西之西土耳  
其等處又直南行由今塞地利亞諸國境以  
抵大秦大秦卽古羅馬今希臘國也所謂迴  
繞一周之海卽黑海非裏海考古證今無可  
疑者近人著地球圖說誤以安息爲布哈爾

如德亞爲古大秦遂以迴繞一周之海爲裏  
海不知布哈爾往如德亞可由西南陸路相  
通何事環海一周舍近求遠耶志略曰大秦  
國之北方亦有陸路可通中國須從罽地利  
亞東北行歷俄羅斯南境至裏海之北岸轉  
而東行歷西域游牧城郭諸部可抵玉關此  
則不入安息境無從遮遏之矣然兩漢時大  
秦北境至日耳曼而止時俄羅斯尙未立國  
罽地利亞以東以北皆匈奴別部常擾大秦

邊境斷無可通之理故通中國惟安息一路  
既爲所遮遏不得不由海道也

臣

秋濤謹案

大秦以北陸路尙不止此由塞地利亞東北  
行經黑海北之計由斯科東抵莫斯科窪又  
東抵托波兒卽可沿額爾齊斯河至金山矣  
元宗王旭烈兀鎮西域每歲由月祖伯地入  
貢卽此道也若兩漢時俄羅斯雖未立國而  
莫斯科窪乃康居北境其北尙有奄蔡諸國  
然泰西諸國紀載皆以爲匈奴實據塞地利

亞之地蓋匈奴本行國故能跨康居之西而  
侵擾大秦也綜觀諸說而秦海之卽爲黑海  
益瞭然矣後魏太武帝遣董琬使西域還言  
其地爲三域自葱嶺以東流沙以西爲一域  
者舌以南月氏以北爲一域兩海之間水澤  
以南爲一域各域之內諸小渠長蓋以百數  
所謂兩海之間卽指黑海以東裏海以西今  
俄羅斯境是也

其東北隅曰亞速海灣所受水以敦河爲最大



臣秋濤謹案亞速海灣一作亞速海一作阿

速灣卽古阿速國境舊名至今尙存內府圖

名謨額底鄂模卽南懷仁坤輿圖所載墨阿

的湖也其與黑海相連處曰以尼加利海峽

敦河亦曰頓河亦曰端河亦曰都汪河

臣秋濤謹

案圖作郭河乃敦字傳寫之譌源出俄羅斯南境澤爾訥城

西兩源並發東流而合又東流逕澤爾訥城

南繞其東有一水自城北來會又東流三百

餘里有一水自德班城西南發源東南流來

會又東流逕多訥特斯城北有一水自南來

入之又東流逕舍勒特斯城南繞其城東折

東流至鄂羅尼城西北鄂羅尼斯西河自北

來會

臣秋濤謹案鄂羅尼斯西河源出都拉城東南德班城西境東北流三百餘里

折東南流百餘里折南流又西南流至德班

城東境復南流折東流逕延噶爾城北又東

流折南流逕達勒特斯城西折東流繞其南

又折南流與敦河合總記云端河自都臘發

源至阿鎖甫入海卽指又南流至鄂羅尼城

此水爲敦河正源也

西南鄂羅尼斯東河自東來會

臣秋濤謹案鄂羅尼斯東

河源出喀山城南七百里外窩集中西流逕色羅克城北境又西流逕畢都克城北境又

西流五百餘里逕郭斯羅傳城南又西流又  
四百餘里逕鄂羅尼城南又西流入敦河又

南流折東流曰端河東流九百餘里逕畢都

克城南集壘多訥特河自南來入之

臣秋濤  
謹案集

壘多訥特河源  
流長六百餘里

又東流逕色羅克城南有一

水自東北來入之又東流三百餘里謨都瓦

底擦河自東北來入之

臣秋濤謹案謨都瓦  
底擦河自喀山城東

南七百里外窩集中發源其西卽鄂羅尼斯  
東河源也謨都瓦底擦河南流東合四水又  
西南流入敦河源又東南流百餘里逕伊羅

流長七百餘里

法城西南倭爾噶河支津自東來會

臣秋濤  
謹案倭

爾噶河即佛兒格河詳見裏海篇內又西南流逕雜里城西北

巴達欣城東南又西南流逕惹爾納雜噶珊

西北又西南流逕薩爾噶珊西北又西南流

逕索啻克薩爾噶珊西北又西南流逕古里

克三噶珊西北有一水自東南來入之折西

流二百餘里納南來二小水又西流三百餘

里至畢斯達賴惹噶珊南多訥特斯河合眾

水自北來會

臣秋濤謹案多訥特斯河亦巨川也發源在澤爾訥城東南境

東南流三百里有一水自北來會又東流經多訥特斯城南境距城四百餘里又東流有

一水自東北來會又東流至仄爾噶斯歸城  
北境折東南流有一水自澤爾訥城南六百  
里外大山北麓發源其山南麓卽亞速海灣  
北岸也二源並發東流而合又東流七百里  
南北各合一水東與多訥特斯河會多訥特  
斯河又東流四百里北合愛多爾河又東南  
流合東北來一水又折而南流合西來之多  
爾河又南流合東北來一水又南逕畢斯達  
賴惹噶珊之西格里又西流逕格里博根城  
博根城之東入敦河

南又折西南流二百里有一水自東南來入  
之又西流有一水自北來入之又西北流有  
一水自北來入之又西流逕仄爾噶斯歸城  
南又西逕噶蘭薩城南又西流二百餘里逕

阿索富城北折南流繞其城西入亞速海灣  
阿索富城一作阿鎖甫城卽古阿速國也南  
懷仁坤輿圖說云大乃河長二千四百里分  
三岔入墨阿的湖卽指此水惟二千當是三  
千之誤南圖別有達乃河與此不同或合爲  
一非是

又有苦湖水亦入焉

臣秋濤謹案苦湖見南懷仁坤輿圖

黑海東面所受之水有名者曰法色河

臣秋濤謹案法色河源出郭達底斯城東北  
山中西流逕其城北又西流有一水自城南  
發源來會又西流逕佛德勒必宋達噶珊北  
又西流入黑海

黑海西北隅所受之水有名者曰涅博爾河

臣秋濤謹案涅博爾河地理備考作聶卑爾  
河全志作尼泊河志略作地尼伯河源出斯  
摩棱斯科東北窩集中西南流納北來一水  
又西流有二小水自南來合而入之又西流

逕斯摩梭斯科北又西流鄂爾薩城水自北  
來入之又西流逕鄂爾薩城南折南流逕圖  
古魯古傳訥城西又西南流逕因斯拉傳城  
北又西南流折西流逕斯郭羅傳噶珊南又  
折而西南流逕郭賴噶珊西有一水自布郭  
傳噶珊西北發源東南流來入之又西南流  
折而西流又折北流又折西流又折南流又  
折東南流又折西南流又折東南流每一折  
輒數十里如鉤已狀又折西南流鄂爾噶河



自西北來入之

臣秋濤謹案鄂爾噶河首受鄂爾噶湖之水東北流折而

東南流入

又西南流科拉河自東北來會

臣

湊博爾河

湊謹案科拉河自斯摩梭斯科東南境二源

並發流二百餘里而合又西南曲曲流九百

餘里入湊

又南流納西來一小水又西南流

博爾河

博壘欣河自西北來入之

臣秋濤謹案博壘欣河自西北發源

合南來一水又東南流

又南流納西來一水

四百餘里入湊博爾河

又南流納西南來一水又南流德斯訥河自

東北來會

臣秋濤謹案德斯訥河自東北窩

水源出巴圖林城東北逕其城南合東一水

來入之又西南流有一水源出訥生噶珊西

南而西流入之又西南流逕博色羅城西北又西南流與涅博爾河會折東南

流逕覺傳城東北卽幾富城亦曰究部亦曰計由斯科以濱涅博爾河壤最膏腴俄羅斯初起之地也又東南流三百餘里折西南流納東南來之薩穆爾河又西南流逕喀達克城東南有一水自西來入之又西南流分爲兩支一東南流環向西南一西南流環向東南行三百餘里復合南入黑海

### 裏海所受水

裏海者大地中央巨澤也

臣秋濤謹案葱嶺之西水皆西流最大者北

曰納林河南曰阿母河皆注於鹹海亦曰達

里岡阿鄂模卽古稱雷菴海也鹹海之西有

巨澤曰裏海蒙古語謂之騰吉斯鄂模泰西

人稱爲喀爾士畢安一曰加斯比約一曰加

士比淹又曰北高海距鹹海不過數百里而

廣大數倍南北約三千餘里東西約千里所

受者西北諸國之水汪洋似海而不通大海

故名裏海其東岸爲西域回部極西之境逾  
裏海而西卽俄羅斯東南境與波斯西北境  
近年俄羅斯拓境日廣其國之南境已盡裏  
海之西北兩岸由裏海之北岸直趨東南中  
間所歷之韃靼回部如軍突機窪之類皆尤  
弱爲所服屬由是進攻裏海東南之布哈爾  
脅而降之以南窺英夷所據之印度蓋裏海  
之東西北三面皆擅於俄羅斯矣臣秋濤謹  
又案南懷仁坤輿圖祇有北高海而無鹹海

其繪葱嶺以西之水如納林阿母二巨川皆入北高海按之地理實係舛誤蓋歐羅巴人於明之中葉始至小西洋各國故於其腹地水道未能致詳魏源海國圖志因之記裏海而遺鹹海且以雷翥海爲裏海別名皆非也今因考北徼水道不敢沿襲前人之誤謹爲辨別如右至鹹海之西雖亦有俄羅斯侵據之地然與俄羅斯本境不同故茲編於鹹海所受水不具錄焉

烏拉河入其東北

臣秋濤謹案伊犁之北曰哈薩克回部之大者也左右二部皆於乾隆中歸附膺世爵納貢稅維謹其右部之北別有部曰北哈薩克以寇鈔爲俗西北二境皆與俄羅斯爲鄰時侵掠俄羅斯邊境俄羅斯設兵防之北哈薩克之西北約四百里卽烏拉嶺烏拉河出焉北哈薩克之西南約八百餘里卽裏海之東北隅烏拉河入焉烏拉嶺亦名烏拉爾圖阿

林有水出其南麓曰哈拉郭特爾西南流額勒克河自東來會折西流庫庫郭特爾水自北來會折南流逕塔奇城東又南流合東來一水折西南流察罕河亦自烏拉嶺發源南流逕塔奇城西來會又西南流六百餘里逕鄂伊楚克城南又西南流四百餘里至阿斯達拉罕東境入裏海總記云阿林墨部東隅有河發源烏臘嶺謂之烏臘嶺河由境內南歷阿薩塔干而注裏海卽此水也全志論歐

羅巴洲水道之最長者烏拉河居其一云

佛兒格河入其正北

臣秋濤謹案佛兒格河一曰佛爾格河一曰倭爾噶河一曰阿爾吉河一曰窩爾牙河一曰窩耳加河一曰窩斯加河一曰窩瓦河譯字雖殊實一川也南懷仁坤輿圖說記歐羅巴洲名川曰窩耳加河長一千六百里分七十二流入海總記曰窩爾牙河自諾戈落發源至阿斯特臘贊入海長二千七百里志略



曰河流之最長者曰窩瓦東南流七千餘里而入裏海今考此河源委實七千餘里諸說里數或有不符蓋傳寫之誤也此河源出倭斯瑪城之西北四百里外窩集中東流七百餘里謨羅噶河自西北合一水來入之又東

流色克納河自西來入之

臣秋濤謹案色克納河源出阿占牙

爾城東南窩集中流數十里諸爲泊復從折泊中流出西南曲曲流折而東流來匯

東北流納西來一小水又東北流有一水自

西來入之

臣秋濤謹案此水首受泊水西南曲曲流折而東流入佛兒格河

折東南流約二百里訥勒爾河自西南來入

之

臣秋濤謹案訥勒爾河源出博勒斯拉傳城西窩集中

緒爲大泊南北袤百數十里東西廣二百里水從泊之東面流出逕博勒斯拉傳城南曰訥勒爾河又東流四百里復

緒爲周數十里之泊水從泊西面流入自北面流出東北流入佛兒格河

又東流

逕惹勒斯拉傳城南郭爾多斯瑪城北又東

百數十里羅佛羅瑪河自北來入之

臣秋濤謹案羅

佛羅瑪河出倭羅克達城東境窩集中西南流三百餘里有一水自東來匯又折南流入

佛兒格河

又東流折東南流烏薩河自東北來入

之

臣秋濤謹案烏薩河出東北窩集中西南流入佛兒格河

折西南流二

百里格勒斯瑪河自西來入之

臣秋濤謹案格勒斯瑪河

源出倭斯瑪城西南山麓東流逕其城南又東流逕鄂羅克城北又東流二百餘里有一水自倭斯瑪城北發源東流逕其城北又東流逕多倭爾噶珊北又東流來會二水既合東流七百餘里逕倭羅威謨爾城南折東北流逕郭羅郭歪斯德城西又東北流逕其城北又東流入

佛兒格河

又西南流郭壘斯城水自東北

來入之

臣秋濤謹案此水出郭壘斯城北又二源合而西南流入佛兒格河

西南流鄂噶河合眾水自西來會

臣秋濤謹案鄂噶河

源出黑海北岸大山北麓北流二百餘里合西來一水又北流二百里折東北流百餘里有一水自南來會又北流合西來一小水又東北流有一水由都拉城東北發源逕城南

自東來入之又折西北流逕博羅傳城北噶  
魯噶城南又西北流有三水合流自北來入又  
入之折東北流有三水合流自北來入又  
東流逕古傳噶城南又東北流二百餘里有  
一水自西北來入之折東流逕多魯薩城南  
又東流有一水自城北來入之又東流逕德  
爾必郭傳城南又東流有一水自城北來入  
之又東流逕巴瑪拉噶珊南有一水自城北  
入之又東流逕巴瑪拉噶珊南有一水自城北  
斯格城北一出城南至城東而合東流百數  
十里貫謨斯夸城折南流合西一小水又南  
繞科特瑪城之東之南而西流入鄂噶河鄂  
噶河又折南流又東流逕羅散城北又東流  
有一水發源窩集中東流逕倭勒都瓦城南  
又東合南來一水逕勒斯利城北而東北入  
鄂噶河鄂噶河又東流折東北流納南來一  
水又東流逕德拉特瑪城北有一水自西南  
發源東北流三百餘里至丹博傳城北合東

來一水又北流五百餘里入鄂噶河鄂噶河  
又東流逕密科艾城北又東北流合南來一  
小水又東北流逕巴里斯多傳城北折南流又  
東北流三百餘里至尼斯納城北又東流與  
佛兒格河會按鄂噶河源流又西南流逕尼  
長二千八百餘里亦巨川也  
斯納城東又西南流都拉河自西南合二水  
行七百餘里來入之又南流納東北一小水  
又南流蘇拉河自西南來入之又東南流逕  
喀山城南有一小水自西南來入之又東流  
二百餘里逕德都斯城北又東有一水自西  
南合一小水來入之又東流喀穆河合眾水

白東北來會

臣秋濤謹案此水異域錄作喀穆河內府圖作噶瑪河源出改

郭羅多城西北山中東南流至城西南有三  
水自城東北合流繞城南來會又南流逕蘇  
爾頂城東又西南流逕索里噶穆斯歸城西  
又西南流鄂索爾蓋河自東來入之卽異域  
錄所云烏索兒科河也又西南流有竺薩瓦  
雅河首受泊水西北流合東來一水行六百  
餘里自東南來會又西南流南合巨古爾城  
西水又西南流逕鄂薩城北薩拉布特城南  
又西南流三百里瓦特噶河源出色羅博達  
城西窩集中西南流逕赫林諾傳城西納西  
來一水又西南逕郭勒布特城西又西南四  
百里逕來索爾城東折東南流與喀穆河會  
喀穆河又南流  
又東流逕巴達雅噶珊南又  
入佛兒格河

東流逕烏薩噶珊北折東南流二百餘里逕

薩瑪拉城西薩瑪拉河自東北發源繞其城  
之東之南來人之折西南流逕德都爾噶珊  
東又西南流二百餘里折東南流錫銓河自  
東北來入之又東南流伊爾日斯河自東來  
入之又南流逕薩拉多博城西噶拉捫河自  
東北山中發源合南來一水逕薩拉多博城  
南來入之又西南流五百餘里有二水自北  
合流來入之又西南逕錫拉哈米斯城南折  
而南分爲二其一支津西流入敦河其一經

流又西南逕達里特薩拉斯城東又南流有一水自東來入之又南流始名額集爾河一作額濟爾河一作額濟勒河一作額濟爾納河自此以南至裏海乃土爾扈特舊游牧處康熙中使臣圖理琛見土爾扈特汗阿玉奇於馬努托海地方卽在此河之旁也至乾隆三十六年土爾扈特歸順中國其未徙之部落仍屬於俄羅斯額集爾河又東南流折南流逕阿噶錫城東又折西流繞其城南又西



南流逕揚噶拉城東又南流分爲二其一支  
東南流至扎穆布魯克回民居處入裏海其  
一經流又分爲二一支東南流至色爾克斯  
城東入裏海一支又分爲二繞阿斯達拉罕  
城四面至城南而合復分數派入裏海

庫墨河得爾集河入其西北

臣秋濤謹案庫墨河源出西北大山東麓東  
南流百餘里至野特散回民所居地南又東  
南流入裏海得爾集河亦發源西北大山東

麓東南流二百餘里至得爾集城南其東北  
卽蓮拉巴斯回民所居地也又東南流入裏  
海

古爾河阿拉斯河入其正西

臣秋濤謹案古爾河源出沙馬吉城西北大  
山南麓東南流三百餘里折東流入裏海其  
入海處北距沙馬吉城約百餘里阿拉斯源  
出額里旺城西百餘里外大山東麓其西麓  
水卽西流入黑海者阿拉斯河東流百數十

里有一水首受正北大泊南流來會其東岸  
卽額里旺城也二水合南流折而東流二百  
數十里分爲二支皆東流入裏海海之南面  
東面各有水來匯以非俄羅斯本境茲不具  
錄

伊策三布拉島中諸水

伊策三布拉島卽新增白臘島唐書所稱海北  
大山也

臣秋濤謹案伊策三布拉島在烏格里達海

灣之北大海中卽南懷仁坤輿圖之新增白  
臘島也島中最東有山曰冰山山南曰雪地  
島之西偏有地曰歪加字島之北有二灣曰  
聖亞納灣曰白肋福爾得灣大地全球說曰  
此地卽唐書所稱骨利幹北渡海日入煮羊  
胛方熟東方已曙者或卽以骨利幹當之誤  
矣臣秋濤謹案新唐書回鶻傳云骨利幹處  
瀚海北其地北距海去京師最遠又北度海  
則晝長夜短日入烹羊胛熟東方已明又地

理志云骨利幹都播二部落北有小海冰堅  
時馬行八日可度海北多大山其民狀貌甚  
偉風俗類骨利幹晝長而夕短參考前載海  
北大山卽今伊策三布拉島無可疑者唐書  
僅稱在骨利幹之北未著地名然此島正與  
廣東瓊州南北相望瓊州有海南之稱則此  
島卽可以海北爲名矣至新舊唐書又載此  
事於天文志止云骨利幹不言又北度海舊  
書作煮羊腓新書作腓羊腓字句亦微有異

同考志傳之修不出一手其間抵牾自所不免後人援引或止撿天文志而未參覈他卷則卽指爲骨利幹者亦不得遽謂之誤異域錄言伊聶謝柏興夏夜極短日落夜深猶可圍碁是則北海南北大略相同正無須聚訟紛紜矣

島中之水曰巴都雅河

臣秋濤謹案巴都雅河源處北極出地七十六度偏西三十五度有奇其水西北流至北

極高七十七度偏西三十八度有奇折北流入海

曰索爾衛斯達河

臣秋濤謹案索爾衛斯達河源處北極出地七十五度有奇偏西三十七度在巴都雅河源西南其水西北流至北極高七十六度有奇偏西三十九度折北流入海

曰集爾集爾河皆北流入於海

臣秋濤謹案集爾集爾河源處北極出地七

十四度有奇偏西三十八度在索爾衛斯達  
河西南其水西北流至北極高七十六度偏  
西四十一度折北流入海自此以西至北極  
高七十四度偏西四十三度處有一水又西  
至北極高七十三度偏西四十四度處有一  
水皆西流入海此地爲島之西南隅當卽南  
懷仁所云歪加字地也

諸湖

臣秋濤謹案俄羅斯境內湖泊極多有源本



溪河緒爲湖泊者亦有源本湖泊溢爲溪河者均已見前茲不複錄其有水緒爲澤淳而不流或雖有本源自行自止不與他水相會不入於海者無可附麗今彙敘於此以便稽考仍以自東至西爲序至坤輿圖及全志備考各書載諸湖名不具源委概附於後云

鞠里里湖

臣秋濤謹案鞠里里湖在噶穆薩特喀城東南約九百里

巴爾古錫穆城東南泊

臣秋濤謹案巴爾古錫穆城東南二百餘里有三小泊又東有一泊周數十里有一水自東北大山發源西南流四百餘里入此泊其北隔山卽衛底穆河源及郭拉河源其南隔山卽尼布楚河源也

色爾喀斯喀拉淖爾

臣秋濤謹案色爾喀斯喀拉淖爾在汗阿林山西麓其南境卽中國科布多所屬地

達布遜淖爾

臣秋濤謹案達布遜淖爾在森博羅特圖拉西北淖爾之南之西皆距額爾齊斯河而與河流不相通

錫拉淖爾

臣秋濤謹案錫拉淖爾在伊錫穆斯歸西南七百餘里上源有二曰金集里克河曰巴差河二水合而西流入於淖爾其南皆沙磧也  
巴爾喀錫淖爾

臣秋濤謹案巴爾喀錫淖爾在錫拉淖爾西南百餘里勒布錫河匯其東北庫庫烏蘇水匯其東南靄古斯河合庫克薩里河巴哈納斯河匯其西北又有一水發源哈薩克境北流經沙磧中行六百餘里自淖爾之南流入淖爾中有山曰阿拉克圖山

鄂羅穆淖爾

臣秋濤謹案鄂羅穆淖爾在錫德特額壘謨阿林之南益袞阿林之東淖爾凡八各周十

數里不等東距巴爾喀錫淖爾二百里

胡爾哈爾金淖爾

臣秋濤謹案胡爾哈爾金淖爾在瓮衮阿林

西北上源曰努拉河西北流入於淖爾

噶順泊

臣秋濤謹案噶順泊在塔奇城西源出烏拉

嶺南流百餘里瀦爲泊

薩穆爾泊

臣秋濤謹案薩穆爾泊在噶順泊西南有二

源並出北山南流入泊泊南岸皆沙磧也

塔爾渾泊

臣秋濤謹案塔爾渾泊在薩穆爾泊西北上源曰塔爾渾河出德爾特科爾山西南流三百餘里瀦爲泊

塔奔泊

臣秋濤謹案塔奔泊在塔爾渾泊西沙磧中

達布孫泊

臣秋濤謹案達布孫泊南倚沙磧西距額濟

勒河康熙間土爾扈特阿玉奇汗遊牧於此  
泊之北

察漢諾爾

臣秋濤謹案察漢諾爾小泊也在揚噶拉城  
西有二小水自北來匯焉

得爾集城西北大湖

臣秋濤謹案此湖周數百里在得爾集城西  
北六百里外窩集中

訥倭郭羅特城西南大湖

臣秋濤謹案此湖周二百餘里源出城東南

山麓西流瀦爲湖

賽美斯湖

北不斯湖

臣秋濤謹案備考作卑不斯湖

臣秋濤謹案地理全志云歐羅巴洲內之湖

拉多牙湖阿尼牙湖賽美斯湖北不斯湖在

俄羅斯今按拉多牙湖一作拉多加湖卽刺

多牙湖也已見波羅的海所受水篇阿尼牙

湖一作疴內加湖已見白海所受水篇其賽



美斯等二湖未詳源委附錄於此俟考

薩壹罵湖

臣秋濤謹案備考有塞罵湖當卽此也俟考

巴牙納湖

壹爾門湖

臣秋濤謹案地理備考云俄羅斯湖之至大

者一名拉多加一名疴內加一名薩壹罵一

名北壹布一名巴牙納一名壹爾門今按拉

多加疴內加均已見前北壹布湖卽博斯布

湖詳波羅的海篇內其薩壹罵等三湖未詳

源委附錄於此俟考

西義湖

臣秋濤謹案此湖見瀛環志略當與阿尼牙湖相近

排半湖

蘇米湖

臣秋濤謹案以上二湖見瀛環志略在錫伯利部境又按俄羅斯西北境湖藪甚多且有最大者其南之水皆分入裏黑二海以此證

魏收書所云水澤以南兩海之間爲一域者  
卽今俄羅斯波羅的海東部以至東俄南俄  
諸部地也

閣辣湖

臣秋濤謹案南懷仁坤輿圖有此湖在加大  
閣辣地之南閣辣卽噶拉之聲轉加大閣辣  
卽昂噶拉也此湖當卽昂噶拉河所匯之水  
記以俟考

葛洛瑪湖

臣秋濤謹案南懷仁坤輿圖有此湖當在揭  
的河附近今無水以應之記以俟考

德勒古里湖

加半古拉湖

臣秋濤謹案以上二湖皆在達爾斯丹境內  
見地理備考

哥各查湖

臣秋濤謹案哥各查湖在亞爾美尼亞境內  
見地理備考

代木爾湖

臣秋濤謹案代木爾湖在亞細亞州俄羅斯  
境內見地理備考

別洛湖

臣秋濤謹案別洛湖又名白湖在俄羅斯國  
境內見地理備考

臣秋濤謹案此湖  
疑卽白哈兒湖

朔方備乘卷二十七

知縣林穗初校  
知縣丁紹基覆校